

初機學佛摘要

初機學佛摘要



初機學佛摘要

佛法大旨

楊文會 仁山

佛法大旨。在引導世人。出生死輪迴。蓋世人生不知來。死不知去。靜言思之。何以忽而有我。未生以前。我在何處。既死以後。我往何所。茫茫昧昧。誠可哀也。大覺世尊。在自性內體究。破妄顯真。忽如夢覺。六通具足。（卽天眼通。天耳通。他心通。宿命通。神足通。漏盡通。）得知過去。世曾經無量生死。或生天上。或生人間。或爲畜生。或墮地獄餓鬼。苦樂千差。未來世中。亦復如是。輪轉無窮。徧觀一切衆生。頭出頭沒。無有了期。遂發大願。修菩薩道。自度度他。福慧圓滿。得成佛果。所說經法。真實不虛。無論何人。依教修行。皆得成佛。但入門有難易之分。證道有淺深之別。及其成功一也。如來設教。義有多門。譬如醫師。應病與藥。但旨趣玄奧。非深心研究。不能暢達。何則。出世妙道。與世俗知見。大相懸殊。西洋哲學。家數千年來。精思妙想。不能入其堂奧。蓋因所用之思想。是生滅妄心。與不

生不滅常住真心。全不相應。是以三身（三身者。法身。報身。應身也。）四智（四智者。大圓鏡智。平等性智。妙觀察智。成所作智也。）五眼（五眼者。肉眼。天眼。慧眼。法眼。佛眼也。）六通。非哲學家所能企及也。

學佛淺說

楊文會 仁山

先聖設教。有世間法。有出世法。黃帝堯舜周孔之道。世間法也。而亦隱含出世之法。諸佛菩薩之道。出世法也。而亦該括世間之法。世間法局於現生。不脫輪迴。出世間法透徹根源。永脫輪迴。兼之世界成壞。羣生變化。凡情所不能測者。佛門修士。朗然大覺。普照無遺。豈不大快乎哉。然則學佛者。當若之何。曰。隨人根器。各有不同耳。利根上智之士。直下斷知解。徹見本源地。六祖壇經。遂啓祖言。何期自性本自清淨。何期自性本不生滅。何期自性本自具足。何期自性本無動搖。何期自性。能生萬法。祖知悟本性。謂惠能曰。不識本心。學法無益。體用全彰。不涉修證。生死涅槃。平等一如。（二乘鈍根。見有五陰生滅之法。

怖畏生死。妄取涅槃。云何對治。以五陰法。自性不生。則無有滅。本來涅槃故。見大乘起信論。此種根器。唐宋時有之。近世罕見矣。其次者。從解路入。先讀大乘起信論。研究明了。再閱楞嚴圓覺。楞伽。維摩等經。漸及金剛。法華。華嚴。涅槃。諸部。以至瑜伽。智度等論。然後依解起行。行起解絕。證入一真法界。仍須回向淨土。面覲彌陀。方能永斷生死。成無上道。此乃由約而博。由博而約之法也。又其次者。用普度法門。專信阿彌陀佛。接引神力。發願往生。隨己堪能。或讀淨土經論。或閱淺近書籍。否則單持彌陀名號。一心專念。亦得往生淨土。雖見佛證道。有遲速不同。其超脫生死。永免輪迴一也。或曰。同一證道。何不概用普度法門。令人省力。答曰。凡夫習氣最重。若令其專念佛名。日久疲懈。心逐境轉。往往走入歧途。而不自覺。故必以深妙經論。消去妄情。策勵志氣。勇銳直前。方免中途退墮也。又問。上文所說出世法門。如何能括世間法耶。答曰。佛法要在見性。真性如水。世事如漚。有何漚不由水起。有何事不由性起耶。子但精勤一心。究

明佛法。方信予言之不謬矣。

勸修淨土要言

鄭清之

今之學佛者。不過禪教律。究竟圓頓。莫如禪。非利根上器。神領意解者。未免蹈頑空之失。研究三乘。莫如教。非得魚忘筌。因指見月者。未免鑽故紙之誚。護善遮惡。莫如律。非身心清淨。表裏如一者。未免自纏縛之苦。總而觀之。論其所入。則禪教律。要其所歸。則戒定慧。不由禪教律而得戒定慧者。其唯淨土之一門乎。方念佛時。口誦心惟。諸惡莫作。豈非戒。繫念淨境。幻塵俱滅。豈非定。念實無念。心華湛然。豈非慧。人能屏除萬慮。一意西方。則不施棒喝而悟圓頓機。不閱大藏經而得正法眼。不持四威儀中而得大自在。不垢不淨。無纏無脫。當是時也。孰爲戒定慧。孰爲禪教律。我心佛心。一無差別。此修淨土之極致也。八功德水。金蓮花臺。又何必疑哉。

畫西方淨土幢記

白居易

我本師釋迦如來說言。從是西方。過十萬億佛土。有世界號極樂。以無八苦（一生苦。二老苦。三病苦。四死苦。五愛別離苦。六怨憎會苦。七求不得苦。八五陰盛苦。）四惡道（謂地獄。餓鬼。畜生。修羅。四惡道也。）故也。其國號淨土。以無三毒（毒害善根之三煩惱。卽貪毒。瞋毒。痴毒是也。）五濁業（五濁者。一衆生濁。二見濁。三煩惱濁。四命濁。五劫濁也。）故也。其佛號阿彌陀。以壽無量。願無量。功德相好光明無量故也。諦觀此娑婆世界（娑婆爲三千大千世界之總名。是一佛攝化之境土也。）微塵衆生（以物粉碎則爲微塵。喻數量之多也。）無賢愚。無貴賤。無幼艾。有起心歸佛者。舉手合掌。必先向西方。有怖厄苦惱者。開口發聲。必先念阿彌陀佛。又範金合土。刻石織紋。乃至印水聚沙。童子戲者。莫不率以阿彌陀佛爲上首。不知其然而然。由是而觀。是彼如來有大誓願於此衆生。此衆生有大因緣於彼國土明矣。不然者。東南北方。過去現在未來佛多矣。何獨如是哉。何獨如是哉。唐中大夫太子少傅上柱國馮翊縣開國

候。賜紫金魚袋。白居易當衰暮之歲。中風痺之疾。乃捨俸錢三萬。命工人杜宗敬。按阿彌陀無量壽二經。畫西方世界一部。高九尺。廣丈有三尺。彌陀尊佛坐中央。觀音勢至二大士侍左右。人天瞻仰。眷屬圍繞。樓臺伎樂。水樹華鳥。七寶嚴飾。五彩張施。爛爛煌煌。功德成就。弟子居易焚香稽首。跪於佛前。起慈悲心。發弘誓願。願此功德迴施一切衆生。一切衆生有如我老者。如我病者。願皆離苦得樂。斷惡修善。不越南瞻部。南瞻部舊作南閻浮提。新作南瞻部洲。閻浮卽瞻部。乃樹名也。提洲之義。此洲之地有瞻部樹。遂以名洲。在須彌山南方之鹹海中。故曰南。便觀西方。白毫大光。應念來感。青蓮上品。隨願往生。從現在身盡未來際。常得親近而供養也。欲重宣此願。而偈讚曰。極樂世界清淨土。無諸惡道及諸苦。願如老身病苦者。同生無量壽佛所。

持名念佛歷九品淨四土說

藕益大師

若欲速脫輪迴之苦。莫如持名念佛。求生極樂世界。若欲決定得生極樂世界。

又莫如以信爲前導。願爲後鞭。信得決。願得切。雖散心念佛。亦必往生。信不直。願不猛。雖一心不亂。亦不得生。云何爲信。一者信阿彌陀佛願力。二者信釋迦文佛教語。三者信六方諸佛讚歎。夫世間正人君子。便無妄語。况彌陀釋迦六方諸佛。豈有妄語。此而不信。真不可救。故須先生深信。勿起疑惑。云何爲願。一切時中。厭惡娑婆生死之苦。欣慕淨土菩提之樂。隨有所作。若善若惡。善則迴向求生。惡則懺願求生。更無二志。是名爲願。信願既具。則念佛方爲正行。改惡修善。皆爲助行。隨功力之淺深。以分九品四土。纖毫不濫。只須自己簡察。不必旁問他人。謂深信切願念佛。而念佛時心多散亂者。卽是下品下生。深信切願念佛。而念佛時散亂漸少者。卽是下品中生。深信切願念佛。而念佛時便不散亂者。卽是下品上生。念到事一心不亂。不起貪瞋癡者。卽是中三品生。念到事一心不亂。任運先斷見思塵沙。亦能伏斷無明者。卽是上三品生。故信願持名念佛。能歷九品的確不謬也。又信願持名。消伏業障。帶惑往生者。卽是凡聖同

居淨土。信願持名。見思斷盡而往生者。卽是方便有餘淨土。信願持名。豁破一分無明而往生者。卽是實報莊嚴淨土。信願持名。持到究竟之處。無明斷盡而往生者。卽是常寂光淨土。故持名能淨四土。亦的確不謬也。問曰。如何持名。能斷無明。答曰。所持之佛名。無論悟與不悟。無非一境三諦。能持之念心。無論達與不達。無非一心三觀。只爲衆生妄想執著。情見分別。所以不契圓常。殊不知能持者卽是始覺。所持者卽是本覺。今直下持去。持外無佛。佛外無持。能所不二。則始覺合乎本覺。名究竟覺矣。問曰。旣始覺合本。則當下卽常寂光。如何亦說往生。答曰。若達當下卽常寂光。又何妨說箇往生。蓋往卽非往。非往而往生。卽無生。無生而生。文殊善財之生西方者。此也。咄哉男子。無措思惟。

念佛切要

徹悟禪師

一切衆生。本來是佛。真心本有。妄性元空。一切善法。性本自具。但以久隨迷染之緣。未斷元空之妄。未證本有之真。善本具而未修。佛本是而未成。今欲斷元

空之妄。證本有之真。修本具之善。成本是之佛。而隨悟淨之緣者。求其直捷痛快。至頓至圓者。無如持名念佛之一行矣。以能念之心。本是全真成妄。全妄即真。所念之佛。亦本全德立名。全名即德。能念心外無別所念之佛。所念佛外無別能念之心。能所兩忘。心佛一如。於念念中。圓伏圓斷。五住煩惱。圓轉圓滅。三雜染障。圖破五陰。圓超五濁。圓淨四十圓念三身。圓修萬行。圓證本真。而圓成無上妙覺也。一念如是。念念皆然。但能念念相續。其伏斷修證。有不可得而思議者矣。以是全佛之心。念全心之佛。實有自心果佛。全分威德神力。冥熏加被耳。一句佛號。不難異緣。十念功成。頓超多劫。於此不信。真同木石。捨此別修。非狂即癡。復何言哉。復何言哉。

與諸同學書

彭紹升 允初

日來讀蓮池先生阿彌陀經疏鈔。及勸修淨土諸文字。瞿然警發。誓於此生。歸於淨土。以南無阿彌陀佛六字。作日用拄杖子。從今以後。不須復道致良知。卽

南無阿彌陀佛六字便是致良知。不須復道存天理。即南無阿彌陀佛六字便是存天理。向來載浮載沈。半上半下。說得全不濟事。說到頭白。又見因聲落地。輪迴去也。豈不痛哉。從今以後。願遯世不見知而不悔。作一齋公齋婆。向廚房竈下安穩過日。矢決定心。驀直闖去。直待華開見佛。得無生法忍。然後回入塵勞。普度一切。今生不敢復作度人妄想。大智度論云。具縛凡夫。有大悲心。欲生惡世。救苦衆生。無有是處。何以故。煩惱強故。吾儕同志數人。年或三十。或四十。不爲少矣。以今年較之。去年不過如是。則明年可知。又明年可知也。求一大根大器直下了得者。竟難其人。若復不擇方便門。求解脫路。生死到來。作何抵對。紹升幸被我佛大恩。黑暗夜中。忽遇明鐙引路。不勝慶幸之至。所願諸兄共作蓮胎骨肉。夾輔提攜。永無相失。豈非千生萬劫一大因緣耶。

答通州孫居士廣諒

蓮池大師

來問出世真諦。夫世即出世。則不須求出。真非妄外。則何用覓真。此意未曾。則

莫若一心念佛。念極而悟。悟則無論。縱不大悟。而離此娑婆。生彼淨土。卽是出世消滅雜念。純一正念。卽是真諦。今亦不管出不出。真不真。但工夫做到一心。自然了當矣。

答湖廣劉守復居士廣曙

蓮池大師

凡夫放心。初學攝心。後乃得心。攝心非止一法。功高易進。念佛爲先。古云。餘門學道。如蟻子上於高山。念佛往生。似風帆行於順水。想起時。不須別作除滅。但舉阿彌陀佛四字。盡力挨拶。便是攝心工夫。忽然悟去。名曰得心。昔一友人謂予曰。今人見六祖道本來無一物。何處惹塵埃。便將神秀時時勤拂拭之句。藐視如一莖草。不知時時拂拭。正學者今日事也。予深善其說。昨聆高論。正與此合。因及之。

答蘇州袁心遠居士廣綬

蓮池大師

畏死者。以未悟本來無生故也。本自無生。焉得有死。何畏之有。然無生未易卒

悟今唯當專誠念佛。久久念至一心不亂。必得開悟。就令不悟。而一生念力。臨終自知死去。必生淨土。則如流落他鄉。得歸故里。阿彌陀佛垂手接引。往生歡喜無量。何畏之有。

普勸念佛

蓮池大師

妄念是病。念佛是藥。久病非片劑所能療。積妄非暫念所能除。其理一也。莫管他妄念紛飛。只貴在念佛精切。字字分明。句句接續。極力執持。方有趨向分所。謂真積力久。而一旦豁然。喻如磨杵作鍼。鍊鐵成鋼者。定不誣也。入道多門。唯此一門。最爲捷徑。不可忽。不可忽。

其二

蓮池大師

此道至玄至妙。亦復至簡至易。以簡易故。高明者忽焉。夫生死不離一念。乃至世出世間萬法。皆不離一念。今即以此念念佛。何等切近精實。若覷破此念起處。即是自性彌陀。即是祖師西來意。縱令不悟。乘此念力。往生極樂。且橫截生

死不受輪迴。終當大悟耳。願放下萬緣。十二時中。念念提撕。是所至望。

其三

蓮池大師

或問。今見世人念佛者多。生西方成佛者少。何也。此有三故。一者口雖念佛。心中不善。以此不得往生。奉勸世人。既是念佛。便要依佛所說。要積德修福。要孝順父母。要忠事君王。要兄弟相愛。要夫妻相敬。要至誠信實。要柔和忍耐。要公平正直。要陰騭方便。要慈悲一切。不殺害生命。不凌辱下人。不欺壓小民。但有不好心起。著力念佛。定要念退。這不好心。如此纔是念佛的人。定得成佛。二者口雖念佛。心中胡思亂想。以此不得往生。奉勸世人。念佛之時。按定心猿意馬。字字分明。心心照管。如親在西方。面對彌陀。不敢散亂。如此纔是念佛的人。定得成佛。三者口雖念佛。心中只顧求生富貴。或說我等凡夫。西方無有我分。止圖來世不失人身。此則不合佛心。佛指引你生西方。你却自不願生。以此不得往生。奉勸世人。凡念佛者。決意求生。休得疑惑。且如天宮富貴。福盡也要墮落。

何況人間富貴能有幾時。若說你是凡夫。西方無分。則聖賢都是凡夫做。安知你不生西方也。便可發廣大心。立堅固志。誓願往生。見佛聞法。得無上果。廣度衆生。如此纔是念佛的人。定得成佛。

示念佛三昧

萬益大師

念佛三昧。名寶王三昧。三昧中王。凡偏圓權實種種三昧。無不從此三昧流出。無不還歸此三昧門。蓋至圓頓之要旨。亦三根普利之巧方便也。衆生心性一而已矣。只此一心。法爾具真如生滅二門。正隨緣而不變。名真如門。即不變而隨緣。名生滅門。依真如門。說圓實教。依生滅門。說偏權教。離真如無生滅。權是實家之權。故可爲實施權。離生滅無真如。實是權家之實。故須開權顯實。爲實施權。有藏通別教之三。開權顯實。統惟圓教之一。權實四教。無非念佛法門。所謂念佛。念他佛。雙念自他佛。約四教成十二種念佛三昧。又常行等四種三昧。同名念佛。一一三昧。各具十二。則四十八種。復次念他佛者。或念相好。念法

門。念實相。以例念自。念雙。亦可各三。廣歷四三昧四教。則一百四十四種。一一種復有無量境觀差別。非言可宣。而持名一法。出佛說阿彌陀經。仍在前來種種三昧之外。觀經云。汝若不能念彼佛者。應稱無量壽佛名字。是也。此持名法門。雖似曲爲中下。仍復最頓最圓。蓋所持之名。無論解與不解。當體無非一境三諦。能持之心。無論達與不達。當體無非一心三觀。請嘗言之。六字彌陀。爲因名故名。爲因心故名。爲亦名亦心故名。爲非名非心故名。若因名故名。名應自持。何待心持。又名能自持。與心何預。若因心故名。是心本有名。則不持時。名何不現。若亦名亦心故名。名能有名。何待於心。心能有名。何待於名。又此名字。誰半屬名。誰半屬心。且不持時。名中半名雖無。心中半名應在。離既各無。合云何有。若非名非心故名。既非名非心。何能更有彌陀名字。如此推名。名字性空。緣生幻有。一名字性。卽一切之字性。名字卽法界中道實相。舉一全收。無一法在名字外。所念境諦既爾。能念觀智例此可知。復次束此境三總名妙假。舉正報